

## **Niev calender tuatschin 2005**

**Il calender 2005 presenta fotografias en color d'entuorn ils anno 1930/40 da Lucas Berther, hotelier Sedrun/Turitg. - Lucas Berther ei staus in fervent promotur dil turissem en Tujetsch.**

Aschia eis el staus iniziand dalla fundaziun dalla Scola e Club da skis. Plinavon ei la Sutgera Cungieri sia ovra. Buca d'emblidar il custeivel relasch en fuorma da numerusas fotografias ed ils differents films che presentan cultura indigena. Lucas Berther ei naschius ils 26 d'uost 1890 sco affon da Placi Berther ed Eleonora Cavegn. Ses geniturs menavan il Hotel Cruna a Sedrun. Suenter la scola claustrala semetta el en en la hotellaria. Egl exteriur seperfectziunescha el en lungatgs. Silsuenter meina el cun success la Cruna.

Sco um da novaziuns e dil progress ha el oravontut destadau igl interess per il sport da skis, per ina uniun da cura e traffic e per in'ovra electrica a Sedrun.

Per sia activitad rasanta corrispundeva la limitaziun ella val mo per part. El serenda ord la val per pli tard lu sorprender il restaurant dalla staziun a Rapperswil. La fin digl onn 1965, la vigelgia da Nadal, miera Lucas Berther, in um ch'ei mai vegnius unfis da far attents sin la bellezza da sia patria siaden els cuolms.

Igl ei reussiu dad edir in bi ed interessant calender che po legrar beinenqualin. Buca mo enconuschents ed amitgs dalla biala Val Tujetsch mo era adherents da bialas fotografias veglias anflan cheu in bi scazi.

Il calender san ins retrer tier Bruno Berther Via Vitg 1 7189 Rueras.

A tuts che sustegnan sin quella via il Forum cultural Tujetsch e la cultura tuatschina engraziein nus zun fetg.

Forum cultural Tujetsch